

# À dilla franca

La chronique de Julian Mattei et Diana Saliceti



À dilla franca ùn pudiamu piantà. Avà tocc' à noi à ripiglià u filu tessu da Petru Ciabrini. Hà tantu summinatu chì tandu li seria piaciuta di vedeci impennà. Hè cusi ch'ella campa una lingua. Da leva in purleva.

## Lacrime di teste more

S'annega a Sardegna. L'acqua hè rifalata dapoi qualchi ghjornu ma fer-manu e lacrime di l'abitanti affannati. À 12 chilometri di a citadella bunifanzina, s'hè scatinata Cleopatra. Ciclopi è cicloni, eccu ciò chì ci arreca di tantu in tantu u mareterraniu è noi altri isulani. 18 morti cusi vicini è un addisperu chì ci cummove tutti. A surella sarda pienghjè i so figlioli è si pò dunque parlà, per noi vicini, d'un affare di famiglia trà Corsi è Sardi. Ed'eccu ch'elle s'assumiglianu più chè mai e duie bandere. Subbitu subbitu, s'hè mossa a ghjente per raccoglie doni e robba di prima necessità. Subbitu subbitu, omu hà capitu chì vicini à noi, c'era un populu in u bisognu. Sarà forse nurmale a solidarietà trà duie isule, à spessu scantate da i puteri centralizati. Si sente tralasciata a Sardegna di pettu à a so sciagura. Un cunsigliu hè statu cunvucatu in Roma, u Papa hà pregatu per tutti, i doni sò mandati anc'avale ma ferma u rimbeccu. Cumu, oghje chì ghj'hè oghje, marosi scemi è acquate maiò ponu continuà à sorprendere? Perché l'autorità ùn averanu pigliatu decisione per prutege e pupulazione è di chi ci vulia forse à fa casu. Luni in Italia, si sapia chì Cleopatra avia da passà : nunda hè statu fattu. Mancu stampa. 85 % di e cummune di Sardegna anu terreni chì risicoghjanu d'esse tocchi da l'inundazione. « L'alluvioni », eccu a parolla impiegata da i giornali italiani in i tituli. S'elli sò cusi in



periculu i paesi di Sardegna, cumu sera chì l'acqua hà pussutu tumbà ? Tocc' à u Statu à difende i so cittadini da i malanni. Baccallà per Sardegna ? « Qui ci piglianu per culunizati, dapoi un pezzu », eccu ciò chì ci dicia un abitante d'Arzachena in a nostra edizione di ghjovi. A Sardegna pare tuttu un' urfanella scurdada... E forse à noi ci pare d'aiutà una surella tralasciata. Forse o... micca. Perché micca ? Perché chì ci vole à dilla : a fratellenza ùn si pesa tutti i ghjorni cù u sole. E parolle ci sò per stuzzicà quelli Sardi cusi numerosi ind'è noi. Tandu ùn sò chè parolle, chè macagne, ma l'avemu tutti intese. Ùn si pò parlà di razzismu ma di difficoltà à rammentassi à nostra fratellenza. Avemu spartutu u mare, u sangue è a lingua. Semu fratelli, campemu nant' à isule surelle. Vultemu digià à i nostri cari paradossi. Lascemuli cascà chì ùn hè u sughjettu. U più impurtante sò i fatti. Da Capi-corsu à Bunifaziu, a ghjente si dà di ri-



menu per stende a manu ver di a Sardegna. E tandu sparisce u mare. Bottolo Pisanu hè Sardu. Semu amichi nant' à facebook. Eccu u so missaghju : « Oltre i morti e i dispersi tanti, troppi, senza case, vite distrutte. E ora ricomincia a piovere. Grazie per l'affetto dei nostri fratelli Corsi. Grazie, Grazie ancora mai un ci scurderemo. »

## L'anu corsa brutta !

U macciu di a Franca marti scorsu era una muntagna da spianà. Dopu à a disfatta di a prima partita contru à l'Ucrania più nimu pudia pate a squadra di Franca. In i caffè a maiò parte di i Corsi eranu Ucrainiani ! À chi parlacciava, à chi diciulava, tutti scumettianu nantu à una bella concia. Ancu Doria era pronta à affaccà si nuda in Cristu per presentà u



tempu nantu à Canal + in casu di vittoria di i Francesi ! U fattu si stà chì tuttu ognunu ci hà trovu l'estru per impennà o fa li falà. Ghjucadori tratechji è pocu impegnati, un sundame patisava 82 % di parè negativi è un disamore di u populu di pettu à a squadra. Cù sta spezia di « Je t'aime, moi non plus », i ghjucadori ùn pudianu mancà si à u Stadiu di Franca. Nanzu à a partita ognunu dicia a sola, à chì era prontu à more nantu à u terrenu, à chì mughjava : « Ci la feremu » ... Tagliemu la à l'accorta : per forza o per amore, ci vulia à vince marti sera ! E po l'anu fatta, anderanu à u Brasiliu per a Cuppa di u mondu di u 2014. Avà i ghjucadori sò quant'è pidochji rifatti, è quandu u pidochju colla in gloria si perde u capu è a memoria. Oramai quelli chì a li facianu falà si ne stanu bassi è zitti. Fora di certi Ucrainiani nustrali accaniti, tutti si credenu digià in Rio è sò quì à salutà u miraculu di a vittoria chì casca cum'è u casgiu nantu à e lasagne. A saperanu i rispunsèvuli di TF1 chì anu cumpratu 130 milioni di eurò i diritti televisivi per u mondiale di l'estate chì vene. Una disfatta di a squadra di Franca l'averebbe messi à paghjolu. Quessi si chì l'anu corsa brutta anch'elli ! D'altronde, da poi marti sera ùn si sente più un rimproveru, mancu più una rimarca nantu à quelli chì eranu cusi criticati. Pare ch'elli appianu digià vintu u Cuppa di u mondu ! Ancu L'Equipe hà scrittu in prima pagina « Respect » u lindumane di a vittoria. Certi diceranu chì in lu 2009 sò stati qualificati per via di una manu di Thierry Henry contru à l'Irlanda, chì quist'annu anu messu un puntu fora di ghjocu è vintu ghjuchendu à 11. contru à 10. Per andà in Rio anu fattu un carnevale, ma avà ferma sempre longa a strada à fa per ballà ci a samba...